



KEMENTERIAN PENGAJIAN TINGGI

KENYATAAN MEDIA

KPT KOMITED PERKASAKAN AGENDA KEBAJIKAN DAN KESEJAHTERAAN PELAJAR LUAR KAMPUS

Kementerian Pengajian Tinggi (KPT) sentiasa peka dan mengambil berat keperluan semasa pelajar, terutamanya bagi memastikan kebajikan dan kesejahteraan pelajar luar kampus terpelihara.

Atas dasar KPT Prihatin, Kementerian telah melancarkan inisiatif Rumah Siswa pada tahun 2021 yang turut merangkumi elemen penubuhan Unit Pengurusan Pelajar Luar Kampus (UPLK) di semua Universiti Awam (UA) dan pembangunan Portal Rumah Sewa Siswa (RSS).

Portal RSS yang boleh diakses melalui pautan **rumahsiswa.mohe.gov.my** berperanan menyediakan platform bagi memudahkan usaha pelajar mencari dan mendapatkan kediaman (rumah/bilik) sewa di sekitar kampus. Tambahan, penyenggaraan premis di dalam Portal ini dilaksanakan oleh pegawai UA sendiri yang bertanggungjawab meneliti dan memastikan kediaman yang dikenalpasti adalah kondusif bagi penginapan pelajar dari aspek kadar sewaan, fasiliti yang disediakan dan keselamatan lokaliti premis.

Sehingga 19 September 2022, seramai lebih 29,000 orang pelajar dari seluruh negara telah berdaftar bagi pencarian rumah sewa menerusi Portal RSS. Dalam masa yang sama, KPT juga akan terus memantau pentadbiran Portal RSS bagi memastikan lebih banyak premis untuk penyewaan tersenarai dengan kadar mampu milik bagi memenuhi keperluan pelajar menginap di luar kampus terutamanya bagi persediaan kemasukan Semester Akademik 1, Tahun 2022/2023 nanti.

Kementerian juga ingin menyarankan agar pihak UA menerusi UPLK terus menyantuni pelajar yang berkeperluan mendapatkan penginapan di luar kampus agar sebarang cabaran yang dihadapi mereka dapat sentiasa dibantu dan dipermudahkan. Pelajar juga dinasihatkan sentiasa berhubung dengan pihak UPLK di UA masing-masing bagi mendapatkan khidmat nasihat dalam pencarian rumah, hal ehwal kontrak sewaan dan perundingan yang berkaitan.

KPT dengan kerjasama Majlis Perumahan Universiti - Universiti Malaysia (MAPUM) juga meneliti ketersediaan kapasiti penginapan pelajar di dalam dan luar kampus bagi mengoptimumkan keperluan pelajar yang semakin meningkat.

Justeru, KPT terus komited agar pelajar luar kampus sentiasa mendapat kediaman yang selamat, mampu milik dan kondusif menerusi capaian yang mudah dan pantas selari dengan aspirasi menjamin kesejahteraan pelajar di institusi pendidikan tinggi.

KEMENTERIAN PENGAJIAN TINGGI

21 September 2022